

三輔黃圖序

易曰上古穴居而野處後世聖人易之以宮室上棟下宇以待風雨蓋取諸大壯三代盛時未聞宮室過制秦穆公居西秦以境地多良材始大宮觀戎使由余適秦穆公示以宮觀由余曰使鬼爲之則勞神矣使人爲之

則苦人矣是則穆公時秦之宮室已
壯大矣惠文王初都咸陽取岐雍巨
材新作宮室南臨渭北踰涇至於離
宮三百復起阿房未成而亡始皇并
滅六國憑藉富疆益爲驕侈殫天下
財力以事營繕項羽入關燒秦宮闕
三月火不滅漢高祖有天下始都長

安寔曰西京欲其子孫長安都於此

也

長安本秦之鄉
名高祖作都

至孝武皇帝承文

景菲薄之餘特邦國阜繁之資土木
之役倍秦越舊斤斧之聲畚鍤之勞
歲月不息蓋騁其邪心以誇天下也
昔孔子作春秋築一臺新一門必書
于經謹其廢農時奪民力也今哀採

秦漢以來宮殿門闕樓觀池苑在關
輔者著于篇曰三輔黃圖云東都不
與焉


三輔黃圖序

終

三輔黃圖載西都城闕官署於凡國中建置沿革一切大略無遺可考見一代制度不可無之書也久不見刻本爲博古之學者患旰江左氏藏此蓋積有世年今江浙叅政桂坡先生出示鼎使序而刻之以不爲私家藏而大人君子公天下之心亦可得而見焉使不刻行之則雖有藏之家者將日就殘蠹不可謂非一墜典也先生刻此亦所以成先世之遺志云

成化庚子三月既望八十一翁嘉禾周鼎伯麗
書

三朝黃圖序



國家圖書館, NATIONAL CENTRAL LIBRARY, TAIWAN, R.O.C.

陳眉公訂正三輔黃圖卷之上

陳繼儒仲醇閱

沈德先天生

張可大觀甫

三輔沿革

禹貢九州舜置十二牧雍其一也古豐鎬之地

平王東遷以岐豐之地賜秦襄公至孝公始都

咸陽秦孝公十二年於渭北作咸陽徙都之咸陽在九嶷山渭水

北山水俱在南故名咸陽秦并天下置內史以
領關中項籍滅秦分其地爲三以章邯爲雍王
都廢丘今興平縣地司馬忻爲塞王都櫟陽董翳爲
翟王都高奴今延州金明縣謂之二秦漢高祖入關定
二秦元年更爲渭南郡九年罷郡復爲內史五
年高帝在洛陽婁敬說曰夫秦地被山帶河四
塞以爲固卒然有急百萬衆可立具因秦之故
資甚美膏腴之地此所謂天府陛下入關而都

之山東雖亂秦故地可全而有也又田肯賀高
帝曰陛下治秦中秦形勢之國帶河阻山持戟
百萬秦得百二焉地勢便利其以下兵於諸侯
猶居高屋之上建瓴水也自是漢始都之景帝
分置左右內史此爲右內史武帝太初元年改
內史爲京兆尹與左馮翊右扶風謂之二輔其
理俱在長安古城中

三輔治所

京兆在故城南尚冠里

京大也天子曰兆民公羊曰京大也師衆也天

子所居

馮翊在故城內太上皇廟西南

翊也翊輔也

地今同州

扶風在夕陰街北

扶持也助也言助風化今岐州

三輔者謂主爵中尉及左右內史漢武帝改曰

京兆尹左馮翊右扶風共治長安城中是為三

輔三輔郡皆有都尉如諸郡京輔都尉治華陰

左輔都尉治高陵右輔都尉治郿王莽分長安

城旁六鄉置師各一人分三輔為六都尉渭城

安陵以西北至栒邑義渠十縣屬京尉大夫府

居故長安寺高陵以北十縣屬師尉大夫府居

故廷尉府新豐以東至湖十縣屬翊尉大夫府

居城東霸陵杜陵以東至藍田西至武功郁夷

十縣屬光祿大夫府居城西茂陵槐里以西至

汧十縣屬扶尉大夫府居城西長陵池陽以北

二 襄陽府志卷之七
役祔十縣屬列尉大夫府居後漢光武之後扶

風出治槐里馮翊治高陵

祭百官表類師古注引黃圖云京兆在尚

冠前街東入故中尉府馮翊在太上皇廟西入右扶風在夕陰街北入故主爵府長安以東爲京兆長陵以北爲左馮翊渭北以西爲右扶風

咸陽故城

在今咸陽東二十里

自秦孝公至始皇帝胡亥竝都此城案孝公十二年作咸陽築冀闕徙都之始皇二十六年徙天下高貴富豪於咸陽十二萬戶諸廟及臺苑

皆在渭南秦每破諸侯徹其宮室作之咸陽北坂上南臨渭自雍門以東至涇渭殿屋覆道周園相屬所得諸侯美人鍾鼓以克之二十七年作信宮渭南已而更命信宮爲極廟象天極自極廟道通驪山作甘泉前殿築甬道自咸陽屬之始皇窮極奢侈築咸陽宮因北陵營殿端門四達以制紫宮象帝居引渭水灌都以象天漢橫橋南渡以法牽牛橋廣六丈南北二百八十

步六十八間八百五十柱二百一十二梁橋之
南北隄激立石柱咸陽北至九嶷甘泉南至鄂
杜東至河西至沂渭之交東西八百里南北四
百里離宮別館相望聯屬木衣綉綉土被朱紫
宮人不移樂不改懸窮年忘歸猶不能徧

宮 馳道閣

黃陽宮秦文王所起在今鄂縣西南二十三里
穽揚宮秦昭王所作在今岐州扶風縣東北

西垂宮文公元年居西垂宮

平陽封宮武公元年代彭戲氏至于華山下居
於平陽封宮

橐泉宮皇覽曰秦穆公家在橐泉宮祈年觀下

步高宮在新豐縣亦名市丘城

步壽宮在新豐縣步高宮西

號宮秦宣太后起在今岐州號縣界

長楊宮在今盩厔縣東南三十里本秦舊宮至

漢修飾之以備行幸宮中有垂楊數畝因為宮名門曰射熊觀秦漢游獵之所

斬年宮穆公所造廟記曰斬年宮在城外秦始皇本紀斬年宮在雍

梁山宮始皇幸梁山在好時

信宮亦曰咸陽宮解在前

興樂宮秦始皇造漢修飾之周圍二十餘里漢

太后常居之

朝宮始皇三十五年以咸陽人多先王之宮庭

小曰吾聞周文王都豐武王都鎬豐鎬之間帝

王之都也乃營朝宮於渭南上林苑庭中可受

十萬人車行酒騎行炙千人唱萬人和收天下

兵古以銅為兵聚之咸陽銷以為鍾鑠高二丈鍾小

者皆千石也銷鋒鐸以為金人十二以弱天下

之人立於宮門三輔舊事云鑄金人立於阿房殿門坐高二丈銘

其後曰皇帝二十六年初兼天下改諸侯爲郡
縣一法律同度量大人來見臨洮其大五丈足
跡六尺銘李斯篆爰恬書董卓悉椎破銅人銅
臺以爲小錢英雄記曰昔大人見臨洮而銅人
鑄臨洮生卓而銅人毀天下大亂卓身滅抑有
以也餘二人魏明帝欲徙詣洛陽清明門裡載
至霸城重不可致使留之

阿房宮亦曰阿城惠文王造宮未成而亡始皇

廣其宮規恢三百餘里離宮別館彌山跨谷輦

道相屬閣道通驪山八十餘里衣南山之顛以

爲闕絡樊川以爲池作阿房前殿東西五十步

南北五十丈上可坐萬人下建五丈旗以木蘭

爲梁以磁石爲門

磁石門乃阿房北闕門也門在阿房前悉以磁石爲之故

專其目今四夷朝者有懸甲懷

小阿周馳爲複道

度渭屬之咸陽以象太極閣道抵營室也阿房

宮未成欲更擇令各名之作宮阿基旁故天下

謂之阿房宮隱宮徒刑者七十餘萬人乃分作阿房宮

或作驪山蘭池宮始皇三十一年爲徵行咸陽與武士四人俱夜出逢盜蘭池注渭城縣有蘭池宮

鍾宮在郿縣東北二十五里始皇收天下兵銷爲鍾鍊此或其處也

馳道按秦本記始皇二十七年治馳道注曰馳

道天子道也蔡邕曰馳道天子所行道也今之中道然漢書賈山傳曰秦爲馳道於天下東窮燕齊南極吳楚江湖之上濱海之觀畢至道廣五十步三丈而樹厚築其外隱以金椎樹以青松漢令諸侯有制得行馳道中者行旁道無得行中央三丈也不如令沒入其車馬

雲閣二世所造起雲閣欲與南山齊

望夷宮在涇陽縣界長平觀道東北臨涇水以

望北夷以爲宮名

林光宮胡亥所造從廣各五里在雲陽縣界

漢長安故城

漢之故都高祖七年方修長安宮城自櫟陽徙居此城本秦離宮也初置長安城本狹小至惠帝更築之按惠帝元年正月初城長安城三年春發長安六百里內男女十四萬六千人三十日罷城高二丈五尺下闊一丈五尺六月發徒

隸二萬人常役至五年復發十四萬五千人三十日乃罷九月城成高三丈五尺下闊一丈五尺上闊九尺雉高三坂周圍六十五里城南爲南斗形北爲北斗形至今人呼漢京城爲斗城是也漢舊儀曰長安城中經緯各長三十二里十八步地九百七十三頃八街九陌二宮九府三廟十二門九市十六橋地皆黑壤今赤如火阪土如石父老傳云盡鑿龍首山土爲城水泉深

二十餘丈樹宜槐與榆松柏茂盛焉城下有池
周繞廣三丈深二丈石橋各六丈與街相直

秦漢風俗

漢志曰秦有四塞之固昔后稷封釐公劉處豳
太王徙岐文王作豐武王治鎬其民有先王遺
風好稼穡本業故幽詩言農桑衣食之業甚備
秦都咸陽徙天下豪富十二萬戶漢高帝都長
安徙諸齊田楚屈昭景及諸功臣於長陵後世

世徙吏二千石高貴富人及豪傑兼并之家於
諸陵強本弱末以制天下是故五方錯雜風俗
不一貴者崇侈靡賤者薄仁義富強則商賈爲
利貧窶則盜賊不禁閭里嫁娶尤尚窮貨送死
過度故漢之京輔號爲難理古今之所同也

都城十二門

長安城東出南頭第一門霸城門民見門色青
名曰青城門或曰青門門外舊出佳瓜廣陵人

邵平爲秦東陵侯秦破爲布衣種瓜青門外瓜
美故時人謂之東陵瓜廟記曰霸城門亦曰青
綺門漢書王莽天鳳三年霸城門災莽更霸城
門曰仁壽門無疆亭

長安城東出第二門曰清明門一曰籍田門以
門內有籍田倉一曰凱門漢書平帝元始四年
東風吹屋瓦且盡卽此門也漢宮殿疏曰第二
門名城東門莽更名曰宣德門布恩亭

長安城東出北頭第一門曰宣平門民間所謂
東都門漢書曰成帝建始元年有白蛾群飛蔽
日從東都門至枳道又疏廣太傅受少傅上疏
乞骸骨歸公卿大夫爲設祖道供張東都門外
卽此門也其郭門亦曰東都卽逢萌掛冠處也
王莽更名春王門正月亭東都門至外郭亭十
三里

長安城南出東頭第一門曰覆盎門一號杜門

三輔黃圖上卷
廟記曰覆盎門與洛門相去十三里二百一十步門外有魯班輪所造橋工巧絕世長樂宮在在城中近東直杜門其南有下杜城漢書集注云故杜陵之下聚落也故曰下門又曰端門北對長樂宮漢書曰戾太子所斫覆盎門出奔湖王莽更名曰永清門長茂亭

長安城南出第二門曰安門亦曰鼎路門北對武庫王莽更名曰光禮門顯樂亭

長安城南出第三門曰西安門北對未央宮一曰便門卽平門也古者平便皆同字武帝建元二年初作便門橋跨渡渭水以趨陵其道易直三輔決錄曰長安城西門曰便橋橋北與門對因號便橋王莽更名曰信平門誠正亭

長安城西出南頭第一門曰章城門漢宮殿疏曰章城門漢城西面南頭第一門三輔舊事曰章門亦曰光畢門又曰便門漢書成帝元延元

年章城門牡自亡

顏師古注云牡所以下附省也亦以鉄爲之王莽

改曰萬秋門億年亭

長安城西出第二門曰直城門漢宮殿疏曰西出南頭第二門也亦曰故龍樓門門上有銅龍本名直門王莽更曰直道門端路亭

長安城西出北頭第一門曰雍門本名西城門王莽改曰章義門著義亭其水北入有亟里民乎曰亟里門

長安城北出東頭第一門曰洛城門又曰高門漢宮殿疏曰高門長安北門也又名鶴雀臺門外有漢武承露盤在臺上

長安城北第二門曰厨城門長安厨在門內因爲門名王莽更名建子門廣世亭

長安城北出西頭第一門曰橫門漢書虜上小女陳持弓走入光門卽此門也門外有橋曰橫

橋漢書作走入橫城門如淳曰橫音光

漢城門皆有候門候主候時謹啓閉也三輔決
錄曰長安城面三門四面十二門皆通達九達
以相經緯衢路平正可並列車軌十二門三塗
洞闢隱以金椎周以林木左右出入爲往來之
經行者升降有上下之別班固西都賦云披三
條之廣路立十二之通門又張衡西京賦云城
郭之制則旁開三門參塗夷庭方軌十二街衢
相經是也

長安九市

廟記云長安市有九各方二百六十六步六市
在道西三市在道東凡四里爲一市致九州之
人在突門夾橫橋大道市樓皆重屋又曰旗亭
樓在杜門大道南又有當市樓有令署以察商
賈貨財買賣貿易之事三輔都尉掌之直市在
富平津西南二十五里卽秦文公造物無二價
故以直市爲名張衡西京賦云郭開九市通闈

帶闔旗亭重立俯察百隧是也又按郡國志長安大俠黃子夏居柳市司馬季主卜於東市晁錯朝服斬於東市西市在醴泉坊

長安八街九陌

有香室街夕陰街尚冠前街三輔舊事云長安城中八街九陌漢書劉屈氂妻梟首華陽街京兆尹張敞走馬章臺街陳湯斬郅支王首縣藁街張衡西京賦云參差夷庭街街相經屢里端

直薨宇齊平是也

長安城中閭里

長安閭里一百六十室居櫛比門巷修直有宣明建陽昌陰尚冠修城黃棘北煥南平等里漢書萬石君奮徙家長安戚里宣帝在民間時常在尚冠里劉向列女傳節女長安大昌里人也

宮

長樂宮本秦之興樂宮也高皇帝始居櫟陽七

年長樂宮成徙居長安城三輔舊事宮殿疏皆曰與樂宮秦始皇造漢修飾之周圍二十里前殿東西四十九丈七尺兩杼中三十五丈深十二丈長樂宮有鴻臺有臨華殿有溫室殿有信宮長秋永壽永寧四殿高帝居此宮後太后常居之孝惠至平帝皆居未央宮漢書宣帝元康四年神爵五采以萬數集長樂宮五鳳二年鸞鳳集長樂宮東闕中樹上王莽改長樂宮為常

樂室在長安中近東直杜門

未央宮漢書曰高祖七年蕭何造未央宮立東

闕北闕

闕門觀也劉熙釋名曰闕在門兩旁中

由出也未央宮殿雖南向而上書奏事請見之徒皆在北闕焉是則以北闕為正門而又有東闕東門至於西南兩面無門闕矣蓋前殿武庫蕭何立未央宮以厭勝之術理然乎

藏兵器太倉

原粟所在一百三十上見其壯麗

甚怒曰天下匈匈勞苦數歲成敗未可知是何治宮室過度也何對曰以天下未定故可因以

就宮室且天子以四海為家非令壯麗無以重

威無令後世有以加也上悅自櫟陽徙居焉未

央宮周圍一十八里前殿東西五十丈深十五

丈高三十五丈前殿曰路寢見營未央宮因龍

首山以制前殿山長六十里頭入渭水尾達樊

水其行道因成土山疏山為臺殿不假板築高

出長安城西京賦所謂龍首以枕前殿此也

至孝武以木蘭為椽木蘭香木文杏為梁柱

杏木之有文者金鋪玉戶金鋪扉上有金華中作獸及龍蛇鋪首以銜環也玉戶以

玉飾戶也華榱璧璫雕楹玉碣楹柱也碣石重軒鏤檻

青鎖丹墀青鎖窻也左城右平右乘車上故使之平左以人上

故為之皆級黃金為壁帶間以和氏珍玉風至

其聲玲瓏然也未央宮有宣室麒麟金華承明

武臺鈞弋等殿又有殿閣三十有二有壽成萬

歲廣明椒房清涼水延玉堂壽安平就宣德東

明飛雨鳳皇通光曲臺白虎等殿廟記云未央

宮有增成昭陽殿漢宮殿疏曰未央宮有麒麟

三輔黃圖上卷

閣天祿閣有金馬門青鎖門玄武蒼龍二闕朱
鳥堂畫堂甲觀非常室又有鈎盾署弄田三輔
決錄曰未央宮有延年殿合歡殿四車殿又漢
宮閣記云未央宮有宣明長年溫室昆德四殿
又有玉堂增盤閣宣室閣三輔舊事云武帝於
未央宮起高門武臺殿漢武故事云神明殿在
未央宮王莽改未央宮曰壽成室前殿曰王路
堂如路寢也按舊圖漸臺織室凌室皆在未央

宮○建章宮武帝太初元年相梁殿災粵巫勇
之曰粵俗有火災卽後起大屋以厭勝之帝於
是作建章宮度爲千門萬戶宮在未央宮西長
安城外帝於未央宮營造日廣以城中爲小乃
於宮西跨城池作飛門通建章宮構輦道以上

下輦道爲閣道可
以乘輦而行

宮之正門曰闔闔

闔闔天門
也宮門名

闔闔者以
象天門也

高二十五丈亦曰璧門左鳳闕

闕上
有金

鳳高丈餘漢書集注曰今長安故
城西俗呼貞女樓卽建章闕也

高二十五丈

右神明臺

言臺高神明可居其上

門內北起別風闕

在闕闕門

內以其出宮垣識風從何處來以爲闕名也

高五十丈對峙并幹樓

高五十丈輦道相屬焉連閣皆有杙

連閣曲閣也以

覆重刻垣墉屏翳之處畫以雲氣鳥獸其形杙懸然

前殿下視未央其西

則廣中殿受萬人三輔舊事云建章周圍二十

里東起別風闕高二十五丈乘以望遠又於宮

門北起圓闕高二十五丈上有銅鳳皇赤眉賊

壞之西京賦云圓闕聳以造天若雙碣之相望

是也廟記云建章宮北門高二十五丈建章北

闕門也又有鳳皇闕漢武帝造高七十丈五尺

鳳皇闕一名別風闕又云嶢嶢闕在圓闕門內

二百步繁欽建章序云秦漢規模廓然泯毀惟

建章鳳闕聳然獨存雖非象魏之制亦一代之

巨觀古歌云長安城西有雙闕上有雙銅雀一

鳴五穀熟再鳴五穀熟按銅雀卽銅鳳皇也楊

震闕輔古語云長安民俗謂鳳皇闕爲貞女樓

三輔黃圖卷一
司馬相如賦云豫章貞女樹長千仞大連抱漢
冬夏常青未嘗凋落若有貞節故以爲名

書曰建章宮南有玉堂璧門三層臺高三十丈
玉堂內殿十二門階陛皆玉爲之鑄銅鳳高五
尺飾黃金樓屋上下有轉樞向風若翔椽首薄
以璧玉因曰璧門建章有駘蕩馭娑矜詣天梁
竒寶鼓簧等宮又有玉堂神明堂䟽圃鳴鑾竒
華銅柱函德二十六殿大液池唐中池

桂宮漢武帝造周四十餘里漢書曰桂宮有紫

房複道通未央宮關輔記云桂宮在未央北中
有明光殿土山複道從宮中西上城至建章神
明臺蓬萊山三秦記未央宮漸臺西有桂宮中
有明光殿皆金玉珠璣爲簾箔處處明月珠金
彫玉堦晝夜光明又西京雜記云武帝爲七寶
牀雜寶按厠寶屏風列寶帳設於桂宮時人謂
爲四寶宮

長安記曰桂宮在未央宮北亦曰北宮

北宮在長安城中近桂宮俱在未央宮北周回

十里高帝時制度草創孝武增修之中有前殿

廣五十步珠簾玉戶如桂宮漢書曰呂太后崩

孝惠皇后廢處北宮又曰哀帝崩貶皇太后趙

氏為孝成皇后退居北宮皇后薄氏退居桂宮

甘泉宮一曰雲陽宮史記秦始皇二十七年作

甘泉宮及前殿築甬道築垣墻如街巷自咸陽屬之關

輔記曰林光宮一曰甘泉宮秦所造在今池陽

縣西故甘泉宮或以高泉山蓋宮周

匝十餘里漢武帝建元中增廣之周十九里去

長安二百里望見長安城黃帝以來圓丘祭天

處漢志雲陽縣有休屠金人徑路神祠三所音義云匈奴祭天處本雲陽甘泉山下秦奪其

地徙休屠右地郊祀志云道甲開山圖云雲陽

先生之墟也武帝造闕於南以象方色於甘泉

宮更置前殿始造宮室有芝生甘泉殿邊房中

芝中藥有芝妙之歌漢舊儀云芝有九莖芝草歌曰九莖連葉芝金

色綠葉朱實夜有光乃作芝房之歌帝又起紫

殿雕文刻鏤黼黻以玉飾之成帝永始四年行
幸甘泉郊泰畤神光降於紫殿今按甘泉谷北
岸有槐樹今謂玉樹根幹盤峙三二百年木也
楊震關輔古語云耆老相傳咸以謂此樹卽楊
雄甘泉賦所謂玉樹青葱也甘泉有高光宮又
有林光宮有長定宮竹宮通天臺通靈臺武帝
作迎風館於甘泉山後加露寒儲胥二館皆在
雲陽甘泉中西廂起彷徨觀築甘泉苑建元中

作石闕封巒鳩鵲觀於苑垣內宮南有昆明池
苑南有棠梨宮

漢未央長樂甘泉宮四面皆有公車

公車主王受
章疏之處

司馬門凡言司馬者宮垣之內兵衛所在司馬
主武事故謂宮之外門爲司馬門按漢宮衛令
請出入殿門公車司馬門者皆下不如令罰金
四兩王莽改公車司馬門曰王路四門分命諫
大夫四人受章疏以通下情

百官衛尉屬官有
公車司馬令丞漢

宮儀云公車司馬掌殿司馬門夜徹宮中天下
上事及闕下凡所徹召皆摠領之令秩六百石

長樂未央建章北宮甘泉宮中宮室臺殿
鴻臺秦始皇二十七年築高四十丈上起觀宇
帝嘗射飛鴻于臺上故號鴻臺漢書惠帝四年
長樂宮鴻臺災臨華殿在長樂宮前殿後武帝
建漢書成帝永始四年長樂宮臨華殿災温室
殿按漢宮殿疏在長樂宮又漢宮閣記在未央
宮

長信宮漢太后常居之按通靈記太后成帝母
也后宮在西秋之象也秋主信故宮殿皆以長
信長秋爲名又永壽永寧殿皆后所處也

太后居
長信宮

右長樂宮

宣室温室清涼皆在未央宮殿北宣明廣明皆
在未央殿東昆德玉堂皆在未央殿西

宣室未央前殿正室也淮南子曰周武王殺紂

於宣室漢取舊名也漢書曰文帝受釐宣室夜
半前席賈生問鬼神之事卽此也又王莽地皇
四年城中少年朱弟張魚等燒宮莽避火宣室
前殿火輒隨之

溫室殿武帝建冬處之溫暖也西京雜記曰溫
室以椒塗壁被之文繡香桂爲柱設火齊屏風
鴻羽帳規地以劉賓翫氈漢書曰孔光爲尚書
令歸休與兄弟妻子燕語終不及朝省政事或

問溫室省中樹何木光不應

漢書京房奏考功課吏法上令公卿

朝臣會
議溫室

清涼殿夏居之則清涼也亦曰延清室漢書曰
清室則中夏含霜卽此也董偃常臥延清之室
以畫石爲牀文如錦紫琉璃帳以紫玉爲盤如
屈龍皆用雜寶飾之侍者於外扇偃偃曰玉石
豈須扇而後涼邪又以玉晶爲盤貯水於膝前
玉晶與冰同潔侍者謂冰無盤必融濕席乃拂

玉盤墜水玉俱碎玉晶千塗國所貢也武帝以此賜偃

麒麟殿未央宮有麒麟殿漢書哀帝燕董賢父子於麒麟殿視賢曰吾欲法堯禪舜如何王閔曰天下乃高皇帝天下非陛下之天下也陛下奉承宗廟當傳之無窮安可妄有所授帝業至重天子無戲言上默然不悅

金華殿未央宮有金華殿漢書曰成帝初方向

學召鄭寬中張禹說尚書論語於金華殿中

承明殿未央宮有承明殿著述之所也班固西都賦序云內有承明著作之庭卽此也漢書武帝謂嚴助曰君厭承明之廬又成帝鴻嘉二年雉飛集承明殿屋

蒼龍白虎朱雀玄武天之四靈以正四方王者制宮闕殿閣取法焉

掖庭宮

在天子左右如肘膝

椒房殿在未央宮以椒和泥塗取其溫而芬芳也武帝時後宮八區有昭陽飛翔增成合歡蘭林披香鳳皇鴛鴦等殿後有增修安處常寧臨若椒風發越蕙艸等殿為十四位成帝趙皇后居昭陽殿號飛燕以其體輕也有女弟俱為婕妤貴傾後宮昭陽合蘭房椒壁其中庭彤朱而庭上糝漆切皆銅杏切門限也黃金塗白玉皆壁帶往往為黃金鈺函藍田璧明珠翠羽飾之自後宮未嘗有

焉班婕妤居增成舍後宮八區增成第三區也哀帝時董賢女弟為昭儀居舍號曰椒風

高門殿漢書曰汲黯請見高門注曰未央宮高門殿也又哀帝時鮑宣諫曰陛下權臣巖穴誠真有益毫毛豈欲臣美食大官重高門之地

非常室漢書成帝綏和二年鄭通里人王褒絳衣小冠帶劔入北司馬門殿東門上前殿至非常室中殿上室名解唾組結佩之召前殿署長業等

曰天帝令我居此業等收縛考問乃故公車大

誰卒病狂易不自知入宮下獄死

大誰者主問非常之人誰

以誰何解因用爲官各有大誰長令此卒者長所領士卒也狂易謂病狂而變易其常也

織室在未央宮又有東西織室織作文繡郊廟

之服有令史

凌室在未央宮藏冰之所也幽詩七月篇曰納

于凌陰周官凌人職掌藏冰大祭祀飲食則供

冰漢書惠帝四年織室凌室災

暴室主掖庭織作染練之署謂之暴室取暴曬

爲名耳有嗇夫官屬

弄田在未央宮弄田者燕遊之田天子所戲弄

耳漢書昭帝記曰始元元年上耕于鈎盾弄田

應劭注云帝時年九歲未能親耕帝籍鈎盾宮

官者近署故往試耕爲戲弄成帝建始三年小

女陳持弓年九歲闕入尚方掖門至未央殿鈎

盾禁中

內謁者署在未央宮屬少府續漢書云掌宮中步帳褻物丁乎漢宮云令秩千石

金馬門宦者署武帝時大宛馬以銅鑄像立於署門因以爲名東方朔主父偃嚴安徐樂皆待詔金馬門卽此路軫廐在未央宮掌宮中輿馬亦曰未央廐漢書曰武帝時期門郎上官桀遷爲未央廐令

右未央宮

駘蕩宮春時景物駘蕩蒲宮中也

駢娑宮駢娑馬行疾貌馬行迅疾一日之間遍宮中言宮之大也

枌諸宮枌諸木名宮中美木茂盛也

天梁宮梁木至於天言宮之高也四宮皆在建章宮

竒華殿在建章宮旁四海夷狄器服珍寶火浣布切玉刀巨象大雀師子宮馬充塞其中

鼓簧宮漢宮闕疏云鼓簧宮周匝一百三十步
在建章宮西北

神明臺漢書曰建章有神明臺廟記曰神明臺
武帝造祭仙人處上有承露盤有銅仙人舒掌
捧銅盤玉杯以承雲表之露以露和玉屑服之
以求仙道長安記仙人掌大七圍以銅爲之魏
文帝徙銅盤折聲聞數十里

右建章宮

壽宮北宮有神仙宮壽宮張羽旗設供具以禮
神君神君來則蕭然風生帷帳皆動

明光宮武帝太初四年秋起在長樂宮後南與
長樂宮相連屬漢書元后傳曰成都侯商嘗疾
欲避暑從上借明光宮蓋卽此王莽建國元年
改明光宮爲安館安定太后居之

太子宮甲觀太子宮有甲觀畫堂

漢書注曰甲
者甲乙丙丁

也次漢書曰孝成皇帝元帝太子也母曰王皇

后元帝在太子宫生甲觀畫堂元后傳曰見於
丙殿此其例也畫堂謂宮殿中彩畫之堂

右北宮

鈎弋宮列仙傳曰鈎弋夫人姓趙氏河間人少
好酒病臥六年右手鈎卷飲食少望氣者云東
北有貴人推而得之見召姿色佳麗武帝友其
手得玉鈎而手展有龍生昭帝姪娠十四月上
日聞昔堯十四月而生今鈎弋亦然乃命所生

門曰堯母門所居曰鈎弋宮自夫人加姪好後
得罪掖庭獄死及殯香一月昭帝卽位追尊爲
皇太后更葬之發六十二萬人起陽陵其棺襯
但有彩履王褒雲陽記曰鈎弋夫人從至甘泉
而卒尸香聞十餘里葬雲陽武帝思之起通靈
臺於甘泉宮有一青鳥集臺上往來至宣帝時
乃不至漢武故事曰鈎弋宮在直門之南

昭臺宮在上林苑中孝宣霍皇后立五年廢處

昭臺宮後十二歲徙雲林館乃自殺

長定宮林光宮中有長定宮三輔決錄曰后從帝行幸於甘泉宮居長定宮孝成許皇后廢處昭臺宮歲餘徙長定宮

長門宮離宮在長安城孝武陳皇后得幸頗妬居長門宮

末信宮孝哀帝尊恭皇太后曰帝太后稱末信宮

中安宮孝哀帝尊恭皇太后曰帝太后稱中安宮

儲元宮在長安城西漢書外戚傳曰信都太后與信都王俱居儲元宮

犬臺宮在上林苑中長安四二十八里漢書江充召見犬臺宮

葡萄宮在上林苑西漢哀帝元壽二年單于來朝以太歲厭勝所舍之此宮

步壽宮秦亦有步壽宮今按其地與秦異則秦漢各有步壽宮耳漢祓祠宮宣帝神爵二年鳳凰集祓祠縣鳳凰集處得玉寶乃起步壽宮梁山宮梁山好畤界卽禹貢云壺口治梁及岐又古公踰梁山于岐下及秦立梁山宮皆北山下也史記秦本紀始皇三十二年幸梁山宮卽此也

黃山宮在興平縣西二十里武帝徵行西至黃山宮卽此也

圓中宮史記秦始皇二十七年巡隴西北地出笄頭過圓中漢書文帝十四年匈奴入蕭關殺都尉燒圓中宮侯騎至雍武帝元狩四年幸雍通圓中道遂北出蕭關又有三良宮相近

集靈宮集仙宮存仙殿存神殿望仙臺望仙觀俱在華陰縣界皆武帝宮觀名也華山記及三輔舊事云昔有太元真人茅盈內記始皇三十

一年九月庚子盈曾祖父濛於華山乘雲駕龍
白日昇天先是邑人謠曰神仙得者茅初成駕
龍上昇入太清時下玄州戲赤城繼世而往在
我盈帝若學之臘嘉平漢武帝內傳曰魯女生
長樂人初餌胡麻乃永絕穀八十餘年少壯色
如桃華一日與親知故人別入華山後五十年
先識者逢女於廟前乘白鹿從王母人因識之
謝其鄉里而去又神仙傳曰中山衛叔卿常乘

雲車駕白鹿見漢武帝將臣之叔卿不言而去
武帝悔求得其子度令追其父登華岳見父與
數人坐於石上敕度令還又華山記弘農鄧紹
八月曉入華山見童子執五綵囊盛栢葉露食
之武帝卽其地造宮殿歲時祈禱焉漢書云華
陰縣有集靈宮又有望仙觀在華陰縣
棠梨宮在甘泉苑垣外雲陽南三十里
竹宮甘泉祠宮也以竹爲宮天子居中漢舊儀

云竹宮去壇三里

宜春宮本秦之離宮在長安城東南杜縣東近下杜

扶荔宮在上林苑中漢武帝元鼎六年破南越起扶荔宮宮以荔枝得名以植所得奇草異木舊蒲

本山薑十本甘蕉十二本留求子十本桂百本密香指甲花百本龍眼荔枝檳榔橄欖千歲好橘皆百餘本上木南北異宜歲時多枯瘁荔枝

自交趾移植百株于庭無一生者連年猶移植不息後數歲偶一株稍茂終無華實帝亦珍惜之一旦萎死守吏坐誅者數十人遂不復蒔矣其實則歲貢焉郵傳者疲斃於道極爲生民之患至後漢安帝時交趾郡守極陳其弊遂罷其貢

五柞宮漢之離宮也在扶風盩厔宮中有五柞樹因以爲名五柞皆連抱上枝覆陰數畝

宣曲宮在昆明池西孝宣帝曉音律常於此度曲因以爲名

鼎湖宮在湖城縣界

又一說在藍田有亭

昔黃帝採首山

銅以鑄鼎成有龍下迎帝仙去小臣攀龍髯而上者七十二人漢武帝於此建宮

思子宮武帝悟戾太子無辜被殺作思子宮爲歸來望思之臺於湖

萬歲宮武帝造汾陰有萬歲宮宣帝元康四年

幸萬歲宮神爵翔集以元康五年爲神爵紀元首山宮漢武帝元封元年封禪後夢高祖坐明堂朝羣臣於是祀高祖於明堂以配天還作首山宮以爲高靈館

明光宮武帝求仙起明光宮發燕趙美女二千人克之率取二十以下十五以上年滿二十者出嫁之掖庭令惣其籍時有死出者隨捕之

池陽宮在池陽南上原之阪有長年阪去長安

五十里

養德宮趙王如意年幼未能就外傳戚姬使舊趙王內傳趙媼傳之號其室曰養德宮

右甘泉宮

日華宮河間獻王德築日華宮置客館二十餘區以待學士自奉養甚薄不踰賓客

曜華宮梁孝王好營宮室苑囿之樂作曜華宮築兔園園中有百靈山有膚寸石落猿巖栖龍

岫又有鴈池池間有鶴洲見渚其諸宮觀相連延亘數十里奇果異樹珍禽怪獸畢有王日與宮人賓客弋釣其中

右日華曜華宮營構不在三輔然皆漢之諸王所建以附宮室篇末

漢畿內千里並京兆治之內外宮館一百四十五所班固西都賦云前乘秦嶺後越九峻東薄河華西涉岐雍宮館所居百有餘區秦離宮二

白漢武帝往往絳治之





陳眉公訂正三輔黃圖卷之下


王桂生百藥

樞李沈 璜若水校

張文林禹玉

苑圖

周靈囿文王囿也詩曰王在靈囿麀鹿攸伏麀鹿濯濯白鳥騞騞毛萇註曰囿所以域養禽獸也天子百里諸侯四十里靈者言文王之有靈



德也靈囿言道行於苑囿也孟子曰文王之囿
方七十里芻蕘者往焉雉兔者往焉與民同其
利也文王靈囿在長安縣西四十二里漢上林
苑卽秦之舊苑也漢書云武帝建元三年開上
林苑東南至藍田宜春鼎湖御宿崑吾旁南山
而西至長楊五柞北繞黃山瀕渭水而東周袤
三百里離宮七十所皆容千乘萬騎漢宮殿䟽
云方三百四十里漢書舊儀云上林苑方三百

里苑中養百獸天子秋冬射獵取之帝初脩上
林苑羣臣遠方各獻名果異卉三千餘種植其
中亦有製爲美名以標竒異茂陵富民袁廣漢
藏鏹鉅萬家僮八九百人於北山下築園東西
四里南北五里激流水注其中構石爲山高十
餘丈連延數里養白鸚鵡紫鴛鴦犛牛青兕竒
獸玃禽委積其間積沙爲洲嶼激水爲波濤致
江鷗海鶴孕雛產鷩延漫林池竒樹異艸靡不

培植屋皆徘徊連屬重閣脩廊行之移晷不能
徧也唐漢後有罪誅没人爲官園鳥獸草木皆
移入上林苑中上林苑有昆明觀武帝置又有
蘭觀平樂觀遠望觀燕昇觀觀象觀便門觀白
鹿觀二爵觀陽祿觀陰德觀鼎郊觀樛木觀椒
唐觀魚鳥觀元華觀走馬觀柘觀上蘭觀郎池
觀當路觀皆在上林苑又舊儀日上林有令有
尉禽獸簿記其名數又有上林詔獄主治苑中

禽獸官館之事屬水衡又上林苑中有六池市
郭宮殿魚臺犬臺獸園

甘泉苑武帝置緣山谷行至雲陽三百八十一
里西入扶風凡周圍五百四十里苑中起宮殿
臺閣百餘所有仙人觀石闕觀封蠻觀鳩鵲觀
御宿苑在長安城南御宿川中漢武帝爲離宮
別館禁禦人不得入往來遊觀止宿其中故曰
御宿三秦記云御宿園出栗十五枚一勝大梨

如五勝落地則破其取黎先以布囊承之號曰
含消此園黎也

思賢苑孝文帝爲太子立思賢苑以招賓客苑
中有堂室六所客館皆廣廡高軒屏風幃褥甚
麗廣陵王胥有勇力常於別園學格熊後遂能
空手搏之莫不絕胆後爲獸所傷陷腦而死

博望苑武帝立子據爲太子爲太子開博望苑
以通賓客漢書曰武帝年二十九乃得太子甚

喜太子冠爲立博望苑使之通賓客從其所好
又云博望苑在長安城南杜門外五里有遺址
西郊苑漢西郊有苑園林麓藪澤連亘繚以周
垣四百餘里離宮別館三百餘所

三十六苑漢儀注太僕牧師諸苑三十六所分
布北邊西邊以郎爲苑監宦官奴婢三萬人養
馬三十萬匹養鳥獸通名爲苑故謂之牧馬處
爲苑

樂遊苑在杜陵西北宣帝神爵三年春起

宜春下苑在京城東南隅元帝紀注東南隅曲池是梨園雲

陽宮記陽車箱坂下有梨園一頃梨數株

株青翠繁密望之如車蓋

池沼

周文王靈沼在長安西三十里詩曰王在靈沼於物魚躍

漢昆明池武帝元狩四年穿在長安西南周回

四里西南夷傳曰天子遣使求身毒國市竹身毒

國即天竺也漢書曰張騫言使大夏時見蜀布印竹杖問所從來曰從東來身毒國可數千里得蜀賈人市而為昆明所閉天子欲伐之越雋昆明

國有滇池方三百里故作昆明池以象之以習

水戰因名曰昆明池漢書曰元狩三年滅隴西北地上郡戍卒之半及吏

弄法者論食貨志曰時越欲與漢用船戰逐水

之穿此池乃大修昆明池也三輔舊事曰昆明池地

三百三十二頃中有戈舩各數十樓舩百艘舩

上建戈矛四角悉垂幡旄葆摩蓋照燭涯涘圖

曰上林苑有昆明池周匝四十里廟記曰池中
 後作豫章大船可載萬人上起宮室因欲遊戲
 養魚以給諸陵祭祀餘付長安厨三輔故事又
 曰池中有豫章臺及石鯨刻石為鯨魚長三丈
 每至雷雨常鳴吼鬣尾皆動一說甘泉宮南有
 昆明池池中有靈波殿皆以桂為殿柱風來自
 香又曰池中有龍首船常令宮女泛舟池中張

鳳蓋

綉鳳為飾

建華旗作權歌

權歌權發歌也又曰權歌詠舟人歌也

雜以鼓吹帝御豫章觀臨觀焉關輔古語曰昆
 明池中有二石人立牽牛織女於池之東西以
 象天河張衡西京賦曰昆明靈沼黑水玄址牽
 牛立其右織女居其左今有石父石婆神祠在
 廢池疑此是也武帝初穿池得黑上帝問東方朔
 朔曰西域胡人知乃問胡人胡人曰劫燒之餘
 灰也三秦記曰昆明池中有靈沼名神池云堯
 時治水嘗停舫於此池通白鹿原原人釣魚綸

絕而去夢於武帝求去其鈎三日戲於池上見
大魚啣索帝曰豈不穀昨所夢邪乃取鈎放之
開三日帝復遊池池濱得明珠一雙帝曰豈昔
魚之報邪

鎬池在昆明池之北卽周之故都也廟記曰長
安城西有鎬池在昆明池北周匝二十二里漑
地三十三頃史記曰秦始皇帝三十六年使者
從關東夜至華陰縣平舒道有人持璧遮使者

曰爲吾遺鎬池君因言曰今年祖龍死使者問
其故忽不見置其璧去使者奉璧具以聞始皇
默然良久曰山鬼不過知一歲事退言曰祖龍
者人之先也祖始也龍者人主之象謂始皇也使御府視璧乃
二十八年渡江所沉璧也

滄池在長安城中舊圖云未央宮有滄池言池
水蒼色故曰滄池

太液池在長安故城西建章宮北未央宮西南

太液者言其津潤所及廣也關輔記云建章宮北有池以象北海刻石爲鯨魚長三丈漢書曰建章宮北治大池名曰太液池中起三山以象瀛洲蓬萊方丈刻金石爲魚龍奇禽異獸之屬瀛洲一名嬴洲亦曰環洲有樹名影木月中視之如列星萬歲一實食之輕骨上有枝葉如蓋群仙以避風雨有金鑿之觀飾以環玉直上於雲中有青瑤龍覆之以雲純之素刻魯玉爲劍龍之狀態火精爲日刻黑玉爲鳥以水精爲月青瑤爲蟾兔於地下爲幾戾以測昏明不虧弦望有香風冷然而至有草名芸苗狀如菖蒲食萊則醉食恨則醒有鳥如鳳身紺翼丹名曰藏

珠每鳴翔而吐珠累用仙人以珠飾仙裳蓋輕而耀於日月也蓬萊山亦名防丘亦名雲來高二萬里廣七萬里水淺有細石如金玉得之不加陶治自然光淨仙者服之東有鬱夷國特有金霧諸仙說北上常浮轉低印有如山上架樓室向明以開戶牖及霧歇咸戶皆向北有浮雲之幹葉青莖紫子大如珠有青鸞集其上下有砂礫細如粉柔風至葉條翻起拂細砂如雲霧仙者來觀而戲焉風吹竹葉聲如鐘磬方丈之山一名密維東方龍場方千里瑤玉爲林雲色皆紫上有通霞臺西王母常遊於其上常有鸞鳳舞如琴瑟和鳴三山統名崑崙亦曰神山上有不死之藥食之輕舉武帝信仙道取少若藥大妄誕之語多起樓觀故池中立三山以象蓬萊瀛洲方丈廟記曰建章宮北池名太液周四十頃

有採蓮女鳴鶴之舟又按三輔舊事云日出賜
谷浴於咸池至虞淵卽暮此池象之也昭帝始
元元年春黃鵠下建章宮太液池成帝常以秋
日與趙飛燕戲於太液池以沙棠木爲舟沙棠木造
丹不以雲母飾於鸕首一名雲舟又刻大桐木
爲虬龍彫飾如真夾雲舟而行以紫桂爲柁棹
及觀雲棹之玩擷菱藻帝每憂輕蕩以驚飛燕
命飲飛之士以金鎖纜雲舟於波上每輕風時

至飛燕殆欲隨風入水帝以翠縷結飛燕之裾
常恐曰妾微賤何復得預結縷裾之遊今太液
池尚有避風臺卽飛燕結裾之處

唐中池周圍十二里在建章宮太液池之南

百子池戚夫人侍兒賈佩蘭後出爲扶風人段
儒妻說在宮內時見戚夫人侍高祖嘗以趙王
如意爲言而高祖思之幾半日不言歎息悽愴
而未知其術使夫人擊筑高祖歌大風以和之

七月七日臨百子池作于闐樂樂闕以五色縷相羈謂之相連愛八月四日出彫房北戶竹下圖碁勝者終年有福負者終年疾病取絲縷就北斗星辰求長命乃免正月上辰出池邊盥濯食蓬餌以祓妖邪三月上巳張樂於池上

十池上林苑有初池麋池牛首池蒯池積草池東陂池西陂池當路池大臺池郎池牛首池在上林苑中西頭蒯池生蒯草以織席西陂池郎

池皆在古城南上林苑中陂郎二水各因爲池積草池中有珊瑚樹高一丈二尺一本三柯上有四百六十二條南越王趙佗所獻號爲烽火樹至夜景常煥然

少府飲飛外池漢儀注飲飛具繒繳以射鳧鴈給祭祀故有池

元帝紀

秦酒池在長安故城中廟記曰長樂宮中有魚池酒池池上有肉炙樹秦始皇造漢武行舟於

池中酒池北起臺天子於上觀牛飲者三千人
又曰武帝作以夸羗胡飲以鐵盃重不能舉皆
抵牛飲西征賦云酒池監於商辛追覆車而不
悟

影蛾池武帝鑿池以翫月其旁起望鵠臺以眺
月影入池中使宮人乘舟弄月影名影蛾池亦
曰眺蟾臺

琳池昭帝元始元年穿林池廣千步池南起桂
臺以望遠東引太液之水池中植分枝荷一莖
四葉狀如駢蓋日照則葉低陰根莖若葵之衛
足名曰低光荷實如玄珠可以飾佩花葉難萎
芬馥之氣徹十餘里食之令人口氣常香益脉
治病官人貴之每遊燕出入必皆含嚼或剪以
爲衣或折以障日以爲戲弄帝時命水嬉遊燕
求日士人進一豆槽帝曰桂楫松舟其猶重朴
汎乎此槽可得而乘耶乃命以文梓爲船木蘭

爲柁刻飛燕翔鷁飾於船首隨風輕漾畢景忘歸起商臺於池上

鶴池在長安城西盤池在西北並廢

水池在長安西舊圖云西有彪池亦名聖女泉蓋冰彪聲相近傳說之訛也

臺榭

周文王靈臺在長安西北四十里詩序曰靈臺民始附也文王受命而人樂其有靈德以及鳥

獸昆蟲焉鄭玄注云天子有靈臺者所以觀殺象察氛祥也文王受命而作邑于豐立靈臺詩曰經始靈臺庶民子來經之營之不日成之劉向新序云周文王作靈臺及爲池沼掘得死人之骨吏以聞于文王文王曰更葬之吏曰此無主矣文王曰有天下者天下之主有一國者一國之主寡人者死人之主又何求主遂令吏以衣棺更葬之天下聞之皆曰文王賢矣澤及枯

骨又沉於人乎周靈臺高二丈周回百二十步
漢靈臺在長安西北八里漢始曰清臺本爲候
者觀陰陽天文之變更名曰靈臺郭延生述在
記曰長安宮南有靈臺高十五仞上有渾儀張
衡所制又有相風銅鳥遇風乃動一曰長安靈
臺上有相風銅鳥千里風至此鳥乃動又有銅
表高八尺長一丈二尺廣尺二寸題云太初四

造

栢梁臺武帝元鼎二年春起此臺在長安城中
北闕內二輔舊事云以香栢爲梁也帝嘗置酒
其上詔羣臣和詩能七言詩者乃得上太初中
臺災漸臺在未央宮太液池中高十丈漸浸也
言爲池水所漸又一說漸臺星名法星以爲臺
名未央宮有滄池池中有漸臺王莽死於此神
明臺見建章宮

通天臺武帝元封二年作甘泉通天臺漢舊儀

云通天者言此臺高通于天也漢武故事築通天臺於甘泉去地百餘丈望雲雨悉在其下望見長安城武帝時祭泰乙上通天臺舞八歲童女三百人祠祀招仙人祭泰乙云令人升通天臺以候天神天神既下祭所若大流星乃舉烽火而就竹宮望拜上有承露盤仙人掌擎玉杯以承雲表之露元鳳間自毀椽桷皆化爲龍鳳從風雨飛去西京賦云通天眇而竦時經百常

而莖擢上辨華以交紛下刻削其若削亦曰候神臺又曰望仙臺以候神明望神仙也

涼風臺在長安故城西建章宮北關輔記曰建章宮北作涼風臺積水爲樓

長樂宮有魚池臺西池臺秦始皇造又有著室臺闕雞臺走狗臺壇臺漢韓信射臺又未央有

果臺東西山二臺未央宮有鈎弋臺通靈臺見

望鵠臺眺瞻臺桂臺商臺避風臺並見池召門

三朝黃圖下卷
長楊樹在長楊宮秋冬較獵其下命武士搏射禽獸天子登此以觀焉

臺上有木曰榭

辟廱

周文王辟廱在長安西北四十里亦曰璧廱如璧之圓雍之以水象教化流行也詩曰於論鼓鍾於樂辟廱毛萇注云論思也水旋丘如辟廱以節觀者鄭玄注云文王作靈臺而知人之歸附作靈沼靈囿而知鳥獸之得其所以爲音聲之道也政通故合樂以詳之

漢辟廱在長安西北七里漢書河間獻王來朝獻雅樂武帝對之二雍宮卽此禮樂志曰成帝時徙爲郡水濱得古磬十六枚劉向說帝宜興辟廱焉

明堂

周明堂明堂所以正四時出教化天子布政之宮也黃帝曰合宮堯曰衢室舜曰總章夏后曰

世室殷人曰陽館周人曰明堂先儒舊說其制不同或曰明堂在國之陽大戴禮云明堂九室一室有四戶八牖凡三十六戶七十二牖以茅蓋屋上圓下方援神契曰明堂上圓下方八牖四牖考工記云明堂五室稱九室者取象陽數也八牖者陰數也取象八風三十六戶牖取六甲之爻六六三十六也上圓象天下方法地八窗卽八牖也四闔者象四時四方也五室者象

五行也皆無明文先儒以意釋之耳禮記明堂位曰朝諸侯于明堂之位天子負斧依南鄉而立明堂也者明諸侯之尊卑也制禮作樂頒度量而天下服知明堂是布政之宮也又孝經曰宗祀文王於明堂以配上帝則周有明堂也明矣

漢明堂在長安西南七里漢書曰武帝初卽位嚮儒術以文學爲本議立明堂於城南以朝諸

侯應劭注云漢武帝造明堂王莽修飾令大

漢書

武帝建元元年議立明堂遣使者安車蒲輪東
帛加璧徵魯申公又郊祀志初天子封泰山泰
山東北陞古時有明堂處處險不敞上欲治明
堂奉高帝未曉其制度濟南人公玉帶上黃帝
時明堂圖明堂中有四殿四面無壁以茅蓋通
水水圍宮垣為複道上有樓從西南入名曰崑
崙天子從之入以拜祀上帝焉於是上令奉高
作明堂汶上如帶圖及是歲修封則祀太乙
五帝於明堂上坐合高皇帝祠坐對之祠后上
於下房以二十大牢天子從崑崙崙道入始年朔
堂如郊祀是歲元封五年也本紀元封二年秋
作明堂于泰山下五年春三月至泰山增封甲
子祠高祖于明堂以配上帝太初元年冬十月
行幸泰山十一月甲子朔旦冬至祀上帝于明

堂

圓丘

漢圖丘在昆明故渠南有漢故圓丘今按高二
丈周回百二十步

太學

漢太學在長安西北七里董仲舒策曰太學賢
士之關教化之本源也王莽作宰衡時建弟子
舍萬區起市郭上林苑中三輔舊事云漢太學

三輔舊事云

中有市有獄

宗廟

宗尊也廟貌也所以髣髴先人尊貌也漢立四廟祖宗廟異處不序昭穆太上皇廟在長安西北長安故城中香室街南鴻翔府北關輔記曰在酒池北

高祖廟在長安西北故城中關輔記曰秦廟中鍾四枚皆在漢高祖廟中三輔舊事云高廟鍾

重十二萬斤漢舊儀云高祖廟鍾十枚各受十石撞之聲聞百里漢書文帝時盜取高廟玉環故事又云光武至長安宮闕以宗廟燒蕩爲墟乃徙都洛陽取十廟合於高廟作十二室大常卿一人別治長安主知高廟事高廟有便殿凡言便殿便室便坐者皆非正大之處所以就便安也○高園於陵上作之既有正寢以象平生正殿路寢也又立便殿於寢側以象休息閑宴之

三輔黃圖下卷
處也○孝惠更於渭北建高帝廟謂之原廟

惠帝廟在高帝廟後

文帝廟號顧成廟

孝文四年作顧成廟在長安城南文帝自為廟制度逼狹

若顧室而成猶文王靈臺不日成之故曰顧成也

景帝廟號德陽宮

景帝中四年造德陽宮蓋帝自作之諱不言廟故號為宮

故事云景帝造德陽宮

武帝廟號龍淵今長安西茂陵東有其處作銅

飛龍故以冠名

武帝元光四年河決濮陽發卒十萬救河決起龍淵之宮取此

為各武帝廟不言宮

昭帝廟號徘徊

宣帝廟號樂遊

在杜陵西北神爵三年宣帝立廟於曲池之北號樂遊按其處

則今呼樂遊園是也因樂遊苑得名

元帝廟號長壽

成帝廟號陽池

太上皇

高祖父也

有寢廟園原廟昭靈后

高祖母也

武哀

王

高祖兄也

昭哀后

高祖嫂也

皆有園孝惠皇帝有寢廟

園孝文太后孝昭太后皆有寢園衛思后侯太

皇祖悼考皆有廟園宣帝父 史皇孫廟曰奉明

元成之世祖宗廟在郡國者六十八合百六十

七所京師自高祖至宣帝與太后皇悼皇考各

自居陵旁立廟并為百七十六又園中各有寢

便殿日祭於寢月祭於殿時祭於便殿寢日四

上食廟歲二十五祠便殿四歲祠又月一遊衣

冠四時祭宗廟用太牢列侯皆獻酎金以助祭

諸侯王及列侯歲時請京師待祠助祭漢儀諸侯王歲以戶口酎

黃金於漢廟皇帝臨受獻金金不如斤兩色惡

王削縣侯免國注云因八月嘗酎會諸侯廟中

出金助祭謂之酎金酎正月旦作酒八月成三

重釀醇酒也味厚故以薦宗廟金黃金也不如

法者奪爵又冊封諸王必於祖廟冊命之示不

敢專也武帝元守六年夏四月乙巳立皇子闕為齊王且燕王偃廣陵王於廟中冊命

漢制封皇子為王者其實古諸侯也周末諸侯

或稱王而漢天子自以皇帝爲稱故以王號加之摠名爲諸侯王

新莽壞徹城西苑中建章承光包陽大臺儲元宮及平樂當路陽祿館凡十餘所取其材瓦以起九廟莽曰千卜渡水之北郎池之南惟玉食予又卜金水之南明堂之西亦惟玉食予將親築於是遂營長安城南提封百頃莽又親舉築三下九廟一黃帝二虞帝三陳胡王四齊敬王五濟北愍王六濟南悼王七元成孺王八陽平頃王九新都顯王殿皆重屋大初祖廟東西南北各四十丈高十七丈餘廟半之爲銅樽楹飾以金銀瑀文窮極百工之巧帶高增下功費數百鉅萬卒徒死者數萬

南北郊

天郊在長安城南地郊在長安城北所屬掌治壇墠郊宮歲時供張以奉郊祀武帝定郊祀之

事祠太一於甘泉園丘取象天形就陽位也祀后土於汾陰澤中方丘取象地形就陰位也至成帝徙秦時后土于京師始祀上帝于長安南郊祀后土于長安北郊

社稷

漢初除秦社稷立漢社稷其後又立官社配以夏禹而不立官稷至平帝元始三年始立官稷於官社之後後漢祭祀志云黃圖載元始儀甚悉今本無合入元始四年宰衡莽

奏曰帝天之義莫大於承天承天之序莫重於郊祀祭天於南就陽位祠地於北就陰位園丘象天方澤象地圓方因象南北從位燔燎升氣瘞理就類牲飲薦粟味尚清玄器成匏勺貴誠因質天地神所統欲類乎上則禋于六宗望秩山川班於群神皇天后上隨王所在而事作焉井泉太陽河東少陽咸夫厥位不合礼制聖王之制必上當天心下合地意中政人事故曰愷梯君子求福不問而求福厥路不通正月泰卦乾坤合脉天地交通萬物聚出其律太族天子親郊天地先祖配天妣配地陰陽之別以日冬至祀天夏至祀后土君不省方而使有司六宗日月星山川海星則北辰川即河山岱宗三光衆明山阜百川衆流滄汙畢澤以類相屬各繫秩望相序於是定郊祀祀長安南北郊罷甘泉河東祀

觀漢博士劉焯釋名曰觀觀也於上觀望也

豫章觀武帝造在昆明池中亦曰昆明觀又一說曰上林苑中有昆明池觀蓋武帝所置桓譚新論云元帝被疾遠求方士漢中送道士王仲都詔問所能對曰能忍寒乃以隆冬盛寒日令袒載駟馬於上林昆明池上環以氷而御駟者厚衣狐裘寒戰而仰都無變色臥於池上隳然自若卽此也

飛廉觀在上林武帝元封二年作飛廉神禽能致風氣者身似鹿頭如雀有羽而蛇尾文如豹武帝命以銅鑄置觀上因以爲名班固漢武故事曰公孫卿言神人見於東萊山欲見天子上於是幸緱氏登東萊留數日無所見惟見大人跡上怒公孫卿之無應卿懼誅乃因衛青白上云仙人可見而上往遠以故不相值今陛下可爲觀於緱氏則神人可致且仙人好樓居不極

高顯神終不降也於是上於長安作飛廉觀高四十丈於甘泉作延壽觀亦如之後漢明帝永平五年至長安悉取飛廉并銅馬置之西門外爲平樂觀董卓悉銷以爲錢

屬玉觀在扶風屬玉水鳥似鵠以名觀也又

曰屬玉似鴨而大長頸赤目紫紺色

宣帝甘露二年十二月

月行幸黃陽

宮屬玉觀

青梧觀在五柞宮之西觀亦有二梧桐樹下有

石麒麟二枚刊其脇文字是秦始皇驪山墓上物也頭高一丈三尺東邊者前左脚折處有赤如血父老謂其有神皆含血屬筋焉

射熊觀在長楊宮

武帝好自擊熊司馬相如從至上林作賦諫揚雄亦作長

賦

石闕觀封巒觀雲陽宮記云宮東北有石門山岡巒糾紛干霄秀出有石巖容數百人上起甘泉觀甘泉賦云封巒石闕弭迤乎延屬

白楊觀在昆明池東

長平觀在池陽宮臨涇水

龍臺觀在豐水西北近渭

涿木觀在上林苑

細柳觀在長安西北三輔舊事云漢文帝大將軍周亞夫軍於細柳今呼古徼是也

成山觀成王在東萊不夜縣於其上築宮闕以

爲觀

成山觀不在三輔例見宮室門

仙人觀霸昌觀蘭池觀安臺觀淪沮觀在城外
又有禁觀董賢觀蒼龍觀當市觀旗亭樓馬伯
騫樓在城內

麒麟朱鳥龍興含章皆館名、

閣

石渠閣蕭何造其下礎石爲渠以導水若今御
溝因爲閣名所藏入關所得秦之圖籍至於成
帝又於此藏秘書焉

三輔故事曰石渠閣在未央宮殿北藏秘書之所

天祿閣藏典籍之所漢宮殿疏云天祿麒麟閣
蕭何造以藏秘書處賢才也劉向於成帝之末
校書天祿閣專精覃思夜有老人著黃衣植青
藜杖叩閣而進見向暗中獨坐誦書老父乃吹
杖端燿然因以見向授五行洪範之文恐詞說
繁廣忘之乃裂裳及紳以記其言至曙而去請
問姓名云我是太乙之精天帝聞卯金之子有
博學者下而觀焉乃出懷中竹牒有天文地圖

之書曰余略授子焉至子歆從授其術向亦不
惜此人焉

麒麟閣廟記云麒麟閣蕭何造漢書宣帝思股
肱之美乃圖霍光等十一人於麒麟閣

三秦記云未央宮有堯閣廟記云未央宮有白
虎閣屬車閣

署

虎威章溝皆署名漢有長水中壘屯騎虎賁越

騎步兵射聲胡騎入營宿衛王宮周廬直宿處

庫

武庫在未央宮蕭何造以藏兵器

靈字金內府太上皇徵時佩一刀長三尺上有銘
字難識傳云殷高宗伐鬼方時所作也上皇遊
豐沛山中寓居窮谷有人治鑄上皇息其旁問
曰鑄何器工者笑曰爲天子鑄劍慎勿言曰得
公佩劍雜而治之卽成神器可克定天下鼎星

精爲輔佐木衰火盛此爲異兆上皇解七首投
爐中劍成殺三牲以燔祭之工問何時得此上
皇曰秦昭襄王時余行陌上一野人授余云是
殷時靈物工卽持劍授上皇上皇以賜高祖高
祖佩之斬白蛇是也及定天下藏於寶庫守藏
者見白氣如雲出戶狀若龍蛇呂后以庫曰靈
金藏惠帝卽位以此庫貯禁兵器名曰靈金

倉

內府

太倉蕭何造在長安城外東南文景節儉太倉之粟紅腐而不可食

細柳倉嘉倉在長安西渭水北古徼西有細柳倉城東有嘉倉

廐

未央大廐在長安故城中漢官儀曰未央宮六廐長樂承華等廐令皆秩六百石

翠華廐大輅廐果馬廐輓梁廐騎馬廐大宛廐

胡河廐騎餘廐皆在長安城外

朝臣觀馬廐在長安城外

都廐天子車馬所在

中廐皇后車馬所在

圈

秦獸圈烈士傳云秦王召魏公子無忌不行使朱亥奉壁一雙詣秦秦王怒使置亥於獸圈中亥瞋目視獸皆血賤於獸面獸不敢動

漢獸園九苑圈一在未央宮中文帝問上林尉
及馮援當熊皆此處獸園上有樓觀

橋

橫橋三輔舊事云秦造橫橋漢承秦制廣六丈
三百八十步置都水令以掌之號為石柱橋漢末

董卓燒之

渭橋秦始皇造渭橋重不能勝乃刻石作力士
孟賁等像祭之乃動今石人在渭橋在長安北三

霸橋在長安東跨水作橋漢人送客至此橋折

柳贈別王莽時霸橋災數千人以水沃救不滅

更霸橋為長存橋便門橋武帝建元二年初作

此橋在便門外跨渭水通茂陵長安城西門曰便門此橋與門

對直因號便橋

飲馬橋在宣平城門外

陵墓漢諸陵先總屬太常令各依其地界屬三輔

漢太上皇陵高帝葬太上皇於櫟陽北原因置

萬年縣於櫟陽大城內以爲奉陵邑其陵在東者太上皇西者昭靈后也

高祖初居櫟陽故太上皇因在櫟陽本年

葬北原

高祖長陵在渭水北去長安城二十五里按高祖本紀十二年四月甲辰崩于長樂宮五月葬長陵長陵山東西廣一百二十步高十三丈長陵城周七里百八十步因爲殿垣門四出及便殿掖庭諸官寺皆在中

呂后陵在高祖陵東按史記外戚世家高后合葬長陵注云漢帝后同茔則爲合葬不合陵也惠帝安陵去長陵十里按本紀惠帝七年八月戊寅崩于未央宮葬安陵在長安城北三十五里安陵有果園鹿苑云

文帝霸陵在長安城東七十里因山爲藏不須起墳就其水名因以爲陵號

景帝陽陵在長安城東北四十五里按景帝下

年作陽陵起邑陽陵山方百二十步高十丈

武帝茂陵在長安城西北八十里建元二年

置茂陵邑

武帝自作陵也

本槐里縣之茂鄉故曰茂陵

周回三里三輔舊事云武帝於槐里茂鄉徙戶

一萬六千置茂陵高一十四丈一百步茂陵固

有鶴觀

戶一萬六千本作六萬一千

昭帝平陵在長安西北七十里去茂陵十里帝初作壽陵令流水而已石擲廣一丈二尺長二

丈五尺無得起墳陵東北作廡長三丈五步外爲小厨裁足祠祝萬年之後掃地而祭

宣帝杜陵在長安城南帝在民間時好遊鄠杜

間故葬此○元帝渭陵在長安北五十六里

成帝延陵在扶風去長安六十二里

一日成帝於霸陵北

步昌亭起壽陵即武帝之廢陵也

王莽時遣使壞渭陵延陵園

門梁愚曰毋使民復思也又以墨色滂其周垣

哀帝義陵在扶風渭城西北原上去長安四十

六里

平帝康陵在長安北六十里興平原口

文帝母薄姬南陵在霸陵南故曰南陵

即今所謂薄陵也

昭帝母趙婕妤雲陵在雲陽甘泉宮南今人呼

為女陵○李夫人墓東西五十步南北六十步

八丈在茂陵西北一里俗名英陵亦云集德臺

一日高二十丈周同三百六十步

王莽妻死葬渭陵長壽園偽謚曰孝穆皇后僭

號億年陵

舊本云億年陵王莽妻死謚曰孝穆皇后葬渭城長壽園西陵曰億年

雜錄

漢宮中謂之禁中謂宮中門閣有禁非侍衛通

籍之臣不得妄入

通籍謂記名於門通出入禁門也籍者為三尺竹牒記其

年紀名字物色縣宮門案省相應乃得入行道豹尾中亦視禁中

子出行道中則有儀衛豹尾至孝元皇后父名禁避之改曰

省中省察也言出入禁中皆當省察不可妄也

鹵簿天子出車駕次第謂之鹵簿有大駕有法

駕有小駕大駕則公卿奉引大將軍參乘大僕

御屬車八十一乘古者諸侯二車九乘秦滅六國兼其車服漢依秦制故大

駕八十一乘屬者言相聯屬不絕也作三行尚書御史乘之備千

乘萬騎出長安出祠天於甘泉備之百官有其

儀注名曰甘泉鹵簿法駕京兆尹奉引侍中參

乘奉車郎御屬車三十六乘北郊明堂則省副

車小駕祠宗廟用之

清道謂天子將出或有齋祠先令道路掃灑清淨

靜室天子出入警蹕舊典行幸所至必遣靜室

令先按行清淨殿中以虞非常蔡邕獨斷曰天子所至曰幸幸

者且幸也世俗謂車駕所至臣民被其澤以僥倖故曰幸也

離宮天子出遊之宮也

行在所天子以四海為家不以京師宮室居處

為常則當乘車輿以行天下天子至尊臣下不敢深瀆言之故託

之於乘輿或謂之車駕車輿所至奏事皆曰行在

陛下陛所由陞堂也天子必有近臣執兵階陛

三輔黃圖卷一
以戒不虞臣下與天子言不敢指斥天子故呼
在殿陛下以告之故稱陛下因卑達尊之意也
上書亦如之如羣臣士庶相與語曰閣下足下
之屬

繭館漢宮闕疏云上林苑有繭館蓋蠶繭之所

蠶室行腐刑之所也司馬遷下蠶室

鍾室在長樂宮高祖縛韓信置鍾室中

作室上方工作之所

長安御溝謂之楊溝謂植高楊於其上也

闕觀也周置兩觀以表宮門其上可居登之可

以遠觀故謂之觀人臣將朝至此則思其所闕

塾門外舍也臣來朝君至門外當就舍更熟詳

所應對之事塾之言熟掖門在兩傍如人臂也

闈闈宮中門也

永巷永長也宮中之長巷幽閉宮女之有罪者

武帝時改為掖庭置獄焉

列女傳周宣王姜后脫簪珥待罪永巷

蠻夷邸在長城內藁街藁街街名蠻夷邸在此街若今鴻臚館

關中八水皆出入上林苑○霸水出藍田谷西

北入渭○澹水亦出藍田谷北至霸陵入霸○

涇水出定安涇陽開頭山東至陽陵入渭○渭

水出隴西首陽縣烏鼠同穴山東北至華陰入

河○豐水出鄂南山豐谷北入渭○鎬水在昆

明池北○牢水出鄂縣西南入潦谷北流入渭

○漓水在杜陵從皇子西北流經昆明池入渭終



國家圖書館, NATIONAL CENTRAL LIBRARY, TAIPEI, R.O.C.